

# PROGLAŠENI POBJEDNICI TAKMIČENJA ADC YOUNG GUNS 7

Priredila / ASJA DUPANOVIĆ

**GLOBALNI ART DIRECTORS CLUB, VODEĆA GLOBALNA ORGANIZACIJA ZA INTEGRIRANE MEDIJE I PRVI GLOBALNI KREATIVNI KOLEKTIV SVOJE VRSTE, 22. JE OKTOBRA U NEW YORKU OBJAVIO IMENA 50 MLADIH KREATIVACA IZ 14 ZEMALJA, OVOGODIŠNJIH DOBITNIKA PRESTIŽNOG PRIZNANJA ADC YOUNG GUNS 7.**

**A**DC Young Guns® je jedino međunarodno, interdisciplinarno takmičenje koje se fokusira na portofolio radova prijavitelja i jednom godišnje pravi svojevrsnu izvidnicu tržišta mladih profesionalaca u oblasti vizuelnih medija i dizajna. Ovogodišnji odabranici – Young Guns 7, odabrani među prijaviteljima iz 84 zemlje (za razliku od prošlogodišnjih 46), predstavljaju impresivnu međunarodnu listu mladih talenata u oblastim grafičkog dizajna, fotografije, ilustracije, oglašavanja, art direkcije, dizajna okoliša, filma, animacije i videa, interaktivnog dizajna, produkt dizajna i tipografije.

Kako bi atmosferu oko ovogodišnjeg takmičenja podigli na viši nivo i stvorili veći osjećaj zajedništva, organizacijski tim globalnog Art Directors Cluba odlučio je da će po prvi puta u žiriju takmičenja sjediti 23 nekadašnja pobjednika.

Svi radovi pobjednika postaju dio trajne kolekcije globalnog Art Directors Cluba, a online će biti na raspolaganju od novembra 2009. Svim pobjednicima bit će uručena prestižna ADC Global kocka, dodijeljeno jednogodišnje članstvo u Klubu te omogućen cijeli niz benefita od strane sponzora takmičenja, sve s ciljem unapređenja njihovih karijera.

Odabrani radovi pobjednika – radovi iz njihovih profesionalnih angažmana kao i privatnih projekata, Moleskine® će ekskluzivno za ADC Global odštampati u svom specijalnom, ograničenom izdanju.

Godina je ovo u kojoj su po prvi puta u okviru takmičenja najuspješnijima dodijeljene i ADC Young Guns-Moleskine® stipendije. Na osnovu ocjena žirija, Moleskine je dodijelio 1,000 američkih dolara Siggi Eggertsson iz Njemačke kao najuspješnijoj učesnici

takmičenja te po 250 američkih dolara prijaviteljima Fx&Mat iz Francuske i Mariu Hugou iz SAD.

Svi mladi kreativci iz ovogodišnje ADC Young Guns klase imaju također priliku kreirati originalna umjetnička djela za najnoviju, njujursku lokaciju "Ace Hotela". The New York Times proglasio je ovaj hotel "najoriginalnijim hotelom u zemlji". Njegova *vintage-mod* estetika pravi je odgovor za urbanog nomada koji traga za novim iskustvima i spoj sa Young Guns takmičenjem čini se idealnim. Hotel će nešto kasnije ove godine odabrati radove mladih umjetnika iz klase ADC Young Guns 7, koji će postati dijelom njegovog interijera.


Ovogodišnjih 50 pobjednika takmičenja pridružuje se elitnoj grupi ranijih pobjednika, među kojima su tadašnje zvijezde u usponu, a danas lideri u svojim poljima, kao što su Stefan Sagmeister i James Victore (grafički dizajn), Deanne Cheuk (ilustracija), Jeremy Floto i Cassandra Warner (aka floto+warner, fotografija), Alexander Gelman (advertising), Rei Inamoto i Jerome Austria (interaktivni mediji), Mike Mills (film i video), Alex Trochut (tipografija), Todd St. John (animacija) i drugi.

U okviru zaključka ovogodišnjeg takmičenja, 29. oktobra je u prostorijama ADC galerije održan tzv. *Five-PlusFive* event – pet ovogodišnjih članova žirija odabralo je pet pobjednika i svo desetero su predstavili svoj rad na način da je svako dobio na raspolaganje 20 slajdova, 20 sekundi po slajdu, ukupno 400 sekundi da ispričaju svoju priču.

Za više informacija o takmičenju posjetite [www.adcyoungguns.org/](http://www.adcyoungguns.org/)



Anna Magnani poster za izložbu, Budor+Čule za Zagreb Film Festival



BEKET, Budor+Čule za štud teatar

Studentski centar, Budor+Čule za Studentski centar Zagreb